

Fasnacht 2017

Sujet: Land- und Schwingfescht



Syt vierzig Joor isch är Wägmacher und in dr Öffentlichkeit, ich frog dr Stäffi wie me das so lang vertreit.
Mi Ziel isch klar seit är, mit e me schelmische Lache,
ich will's eifach länger als dr Imbode mache.

Lasagne, Würscht, Hackfleisch das chönnts alles sii,
si düen dir ohni das des merksch e bitzli Rossfleisch drü.
Um uff dr sichere Site z`si, chauf ich bim Mathis i,
dä duet in sini Würscht scho lang kei Fleisch me dri.

D' Barbara Peterli het mit Ihrem Wolf sichtlich Müeh,
jä är chunt in letschter Zyt immer z`früh.
Was hänn dir denn für Gedangge, hei ei ei,
D`Rynacherstross isch fertig baut, är chunnt fröhner Hei.

Verträter vo Spitex, Prosenectute und Geriatrie,
Verwalter vom Bluemerain und dr Termitte sin au drbi.
Alli buule um dr Samsi, vor sim Hof e riese Stau,
är bechunnt jetzt denn die erschti AHV.

Am heilig Obe spot lauf ich via Chilch-Platz hei,
do hangt mir plötzlich dr Ängel Gabriel am Bei.
nimm mi mit - fleht är, und chrallt sich an minni Hose,
die Wiehnachtsgschicht vom Cilche-Chor cha ich nit lose.

E neue Wachhund han ich, är isch e ganze Liebe,
är folgt guet und mir zwei düen s`Stäggli hohle üebe.
Doch minere Fraue git är sis Pfötli nit, e sone e Mischt,
Ich glaub jetz boll, dä Hund isch Islamischt.

Dr Dokter FMH het noni lang dr Sächzigscht gha,
är passt sini Uftritt neuerdings sim hohe Alter a.
Dorum entloht är sinni Schwöschter Gundula,
und stellt neu s' Rolator-Rööslü a.

Mir hei Ettiger im FC, so wie au in dr Muusig,
ohni Ettiger dönti dr Männerchor zimmlig luusig.
Ich frog mi wie das mit Därwil witer goht,
däm Dorf wo läbt und gli im Schatte vo Ettige stoht.

Nach de letschte Wahle ärgeret sich eini bis an Bach,
ihri Wahlresultat sige gottserbämlich schwach.
Das sig nit ihri Schuld seit sie, mir findes witzig,
Nei d' Wähler sige mit de Stimme eifach z Gytzig.

Bettsagge



Ich bi dr Muni Munthero, uff 5-Tausig Franke gschätzt,
bi am Schwingfescht z' Därwil als Sieger Muni gsetzt.
Si hei mi letschte Summer taufft, mit Wiss-Wyy Übergosse,
die Därwiler si scho komisch Lüt, d Ettiger hätte nen gsoffe.

Nach minere Tauffi isch denn dr Wolf ans Mikrofon,
verstand vo dämm wo dä verzellt, nit en einzige Ton.
Ä Wolf annere Muni-Tauffi, das isch kei Illusion,
me legt jetzt bi de Schwinger au Wärt uff Integration.

Euse Ralph dr Theolog, het mi denn no gsägnat,
mit sim WC-Bürschtel mit Weihwasser berägnat.
Während dr ganze Prozedur, schielt dr Kreiselmeyer
die ganz Zyt iversüchtig uf minni grosse - Hörner.

Im O.K. hets zwei Hubeli, das macht mi scho konfuus,
dr Jonas isch dr Wirtschafts-Chef, o-Jee, o-Jee, o Gruus.
Dr ander isch dr Presidänt, als Mathias bekannt,
isch trotz sim grosse breite Grind, nit mit mir verwandt.

Dr Heggedorn luegt für d Finanze, Sponsoring und so,
für Schriebarbet und E-Mail, isch d Marisa do.
Bi dämm illuschte O.K. stunsch, händ dir d`Ohre gspitzt,
dass überall im Gmeini Wappe, s`schwarz Eggli richtig sitzt.

E Buffet hets denn au no gä, mit feine Canapèe,
Schingegipfeli, Därwiler Wyy, was willsch denn no meh.
Bim Astooh hoff ich gits für mi, ächt au no öbbis in minni Schnuure,
doch wo ich vorne stand isch alles wägg, dr Küng Georges isch
scho duure.

D' Alphorn-Gruppe Därwil het denn au no a vo spiele,
ei Blöser het e rote Chopf, ein duet bim bloose schiele.
Und ei Horn spielt vo ganz e lei, jä gseh ich nit rächt us mim Grind,
aa.. nei jetzte gseh ichs au, dört blost jo d Silveli Gschwind.

S`Gmeini TV het denn no, e Meinigsumfrop gmacht,
dr Frei Rolf het dört Uskunft gä, und in d`Kamara glacht.
Das git e super Fescht seit är, ich finds gar nit absurd,
Hauptsach isch es het gnueg Bier, und ich cha drei Taag furt.

Ich bi vom obere Baselbiet, äxtra do abe choo,
doch jetzt won ich dä Zirkus gseh, würd ich gärn wieder goo.
Für das Chappe-Fescht im Summer, ha ich für mi dängt
hät als Sieger-Muuni, dr Schänggeli au glängt.

